



Sesida dals

Communitgà ils

Protocol nr.

21 d'october 2019

24 d'october 2019

770

Incumbensa Michael (Donat)

concernent ina regulaziun uffiziala da lufs che chaschunan donns

Resposta da la regenza

Per la regenza chapaivla è la valitaziun sco ch'ella vegn preschentada en l'incumbensa e tenor la quala gist l'agricultura è pertutgada spezialmain da la problematica dals animals da rapina gronds. La midada dals manaschis da pastgira e d'alpegiada ad ina protecziun da muntaneras che funcziuna bain è difficila, intensiva areguard il temp e chaschuna gronds custs.

En il chantun Grischun vegni empruvà dapi onns sin tut ils plauns pussaivels da pussibilitar la convivenza dal luf e da l'uman en il territori chantunal utilisà en moda intensiva. Quai sa mussa d'ina vart en il management dals animals da rapina gronds pratitgà consequentamain ed en la stenta per ina communicaziun uschè transparenta sco pussaivel. Da l'autra vart vegn quai suttastritgà tras l'engaschament da la cussegliaziun per la protecziun da muntaneras ch'è vegnì stgaffi al center da furmaziun e cussegliaziun agricola Plantahof. Cun engaschament ed en il fratemp er cun gronda experientscha vegnan cussegliads ils possessurs da muaglia davart il tema da la protecziun da muntaneras. Pervia da la derasaziun creschenta dal luf sin il territori chantunal e pervia dals ultims eveniments sto però vegnir constatà in svilup dal cumportament da singuls lufs, ma er da singuls trieps, che chaschuna conflicts. Sch'i dat – malgrà las mesiras per la protecziun da muntaneras – donns en muntaneras d'animals da niz, dovri mesiras effizientas per pudair intervegnir svelt al lieu.

La legislaziun actuala permetta – sut tschertas premissas e cun il consentiment precedent da l'uffizi federal d'ambient (UFAM) – ina regulaziun d'uffizi dals lufs che chaschunan donns. I vegn differenzià tranter la sajettata uffiziala d'in singul luf, sche quel chaschuna in donn concret e considerabel (art. 12 al. 2 da la lescha federala davart la chatscha e la protecziun dals mamifers e dals utschels selvadis [lescha da chatscha, LChP; CS 922.0]) e la regulaziun uffiziala d'in triep da lufs che sa reproducescha actualmain, sche quel chaschuna in grond donn concret (art. 12 al. 4

LChP). Questa pussaivladad per "regular ils lufs" en questa furma exista pir dapi la revisiun da las disposiziuns executivas tar la LChP mez 2015. La premissa è ch'i dettia donns, malgrà mesiras effectivas per proteger las muntaneras.

La stad 2019 han lufs dal triep dal Beverin stgarpà var 48 nursas e chauras. En quest connex èn vegnidas mazzadas durant duas attatgas – il zercladur sin il Prau da l'Alp ed il fanadur a Stussavgia-Neukirch – tut en tut 15 chauras sin pastgiras ch'eran protegidas cun mesiras efficazias per la protecziun da muntaneras. Cun quai è la limita da donns definida en la lescha vegnida cuntanschida per l'emprima giada e las cundiziuns per conceder ina permissiun da regulaziun tras il chantun èn stadas ademplitas. Da vart da las autoritads è vegnida iniziada directamain la procedura per regular il triep dal Beverin. Suentar che l'analisa genetica è stada avant maun e sin ina dumonda correspondentia ha il UFAM dà ils 23 da settember 2019 ses consentiment a la sajettata da tut en tut quatter lufs dal triep dal Beverin, schanegiond ils animals geniturs. Ils 4 d'october 2019 è vegnida relaschada la disposiziun chantunala per regular il dumber dals lufs dal triep dal Beverin.

La regenza è persuadida che la convivenza tranter l'uman ed il luf en la cuntrada cultivada è mo pussaivla, sch'i dat la pussaivladad d'intervegnir en cas da lufs che han in cumportament problematic e da prender mesiras per regular il dumber. Ultra da l'incumbensa da protecziun en il tractament da spezias protegidas tutga il prender consequentamain mesiras d'intervenziun pia precis uschia tar la pratica da las autoritads responsablas sco la realisaziun da mesiras da prevenziun e da spaventada. I po pia vegnir constatà che las competenzas concedidas dal dretg per regular d'uffizi lufs resp. trieps da lufs, che chaschunan donns, vegnan gia oz duvradas en moda consequenta e realisadas immediatamain. Plinavant ha la regenza buna speranza che la lescha federala davart la chatscha, che l'assemblea federala ha revedì, dettia las libertads giavischadas per regular il dumber da lufs ad ina dimensiun acceptabla.

Sa basond sin questas consideraziuns propona la regenza al cussegl grond d'acceptar questa incumbensa.



En num da la Regenza

Il president:

Il cancellier:

Dr. Jon Domenic Parolini

Daniel Spadin